

巖鎮誌艸貞集

余華瑞
兩麓撰次



程 佶自閑校閱



藝文下目錄

題造水口臺塔疏語

鄭 佐

水口塔上魁星告文

鄭 佐

巖鎮鄉約敘 嘉靖甲辰

鄭 佐

題巖鎮備倭鄉約 嘉靖乙卯

方元楨

程孝子合葬兩世墓誌銘

潘之恒

紀余元昭公重修新橋事

王泰徵

重修通濟橋記

吳崧

程君重建孫公橋記

余華瑞

余媛完壁傳

汪濟淳

巖鎮文筆峰詩

夏言

巖鎮八景詩序

閻禹錫

八景詩

唐邦植
余備

續增巖鎮十二景詩

鄭佐

附巖鎮十二景絕句

余華瑞

喜松兄入社詩

有序

潘句

謝烈婦斷石吟

有序

王寅

客園雜咏

并序

潘一駒

補遺

再修芥菴亭樓後記

余華瑞

題造水口臺塔疏語

鄭佐

巖寺鎮上人家原是十分勝地科第坊邊水口獨少
一座高山從來洩處宜收誰道化工莫補不難着力
要在齊心鳳臺九仞截雲橫成工賴衆雁塢七層標
日上好事由人西配上蔭山東屹中流柱兩街人傑
應俱願下手益高一鎮地靈須憑仗前人作計財需
有限福力無邊

水口塔上魁星告文

鄭佐

世多有塔事佛崇虛我因其制不本其初奉此文星
題名是於惟鎮水口稍不完密衆欲障之非由強率
勞實因心成非不日有臺如硯有峯如筆七級巍巍
文星之室惟神是居光芒麗天旋樞斡斗人文是宣
五星聚之三台是聯昔聞雁塔今見鴻漸有萬斯名
托茲石檢其鐫惟賢祈無神忝神其主之我事非諂

巖鎮鄉約敘

嘉靖甲辰

鄭佐

維我巖鎮居當衝要道遠郡城官府之法嘗三令而

五申里社之條亦並行而兼舉夫何今者天時亢旱
人心憂危奸黨乘機邪謀竊發假稱借貸敢擁衆于
孤村倚恃強梁輒紛臂于卑弱白晝公行而無忌昏
夜不言而可知宜預為桑土之謀庶可免剝膚之患
是以衆謀僉同羣策畢舉一鎮分為十八管有紀有
綱每管各集數十人一心一德毋小勇而大怯毋有
初而鮮終毋生事而敗盟毋見利而忘義理直氣壯
強暴知所警而潛消力協心孚良善有所恃而無恐

庶患難相恤之義復敦而仁厚相成之俗益振所有
議約悉為條開

題巖鎮備倭鄉約

嘉靖乙卯

方元楨

書貴有備易示豫防待暴客必在重門戒不虞尤須
除器惟我巖鎮遠郡城雖二舍餘顧此居民視他村
奚啻萬竈即今倭寇勢甚陸梁零落孤踪輒奔潰而
四出偷生餘孽益草竊而蔓延况入我久有先聲顧
禦渠容無善策爰集里衆重訂新盟規約模倣甲辰

荒歲禦寇之條事款益損大叅雙溪鄭公之舊固嚴
閘柵庶緩急守衛有基推舉驍勇俾臨事當關足恃
用告十八管首領相率上下街吾人請合志而同心
各效謀而宣力庶幾人和愈于地利奚啻五里之城
所謂講武正以銷兵大倡萬夫之敵因而潛消腹中
奸宄抑且深助官府科條有益良多為利甚大欲保
家室勿謂此舉為迂斯樂昇平尚亦施由茲始

程孝子合葬兩世墓誌銘

潘之恒

嗚呼此里人程孝子士章所營之墓也士章父曰巖
註故佃僮士號萬川以見志辭闈闈遠遊遼陽採鹽
策得補國子諸生尋以疾卒所交馮都司某為之殯
而葬于高達子之阡付牒守焉語僕法識其地第招
魂往訃而家會千年化鶴歸爾時室王氏生子士章
六歲矣在母腹六月即與父別父未之知也其交遊
安能知之僕法訃至王氏哀毀屢濱死而蘓上奉舅
時菴公洎姑翟氏下撫士章有叔曰巖論亦早卒子

然一身延三世不絕之緒無論苦節其勞瘁為何如
哉至歲丙戌時菴公歿殯于荷塘而士章齒漸長母
王為聘棠樾鮑氏貴族恩典公女女一人亦適溪南
吳一和逾三年庚寅正月大母翟孺人亡王氏勉襄
喪事三月而相繼歿比隣方獻成先生憫其孤能自
立薦于方少司徒公之任君授計金陵既十四年矣
歲己酉任君暴卒士章大慟曰不肖孤之年逾三十
矣知有父者二十年而遺骸在八千里外此身無足

為役而賈歸父之志以事人日兢兢以勞自積而將有所請也天不惠歸父骨而遽奪吾所依為之腐心面目黧黑言步失次俛俛然若無所之任君之仲子若岸有心人也方在疚見士章而問曰君何色之慘抑重有憂乎拜而曰然未敢言也三問之則慟哭而不能起起復哽咽而含泣言士章生三十餘年而未
有父也將以君父而有吾父今君父歿而士章終無父矣言之而君憐許則累君不則士章死無所何以

報君家德是以見于色而為君窺也君將謂之何若岸憮然曰吾獨非人子乎乃令人痛吾父而不能有其父也孤將為吾父以還而父而存吾父志乎于是謀諸十人聚金三百期以次歲歸而九人中多不能辦已居半以畀之曰行矣萬里之塗百年之骨吾為子虞無久需也乃促裝行以僕法從年八十餘猶幸健乞縶于京兆劉公劉公批縶尾云士章遺腹之子未覩父面間關萬里覓父骨于蒼莽中還正故坵此

仁人孝子之至情也焉往而不得哉庚戌八月朔抵遼陽訪高達子已塵土久矣旁人引其居處有子世勲故童時執役萬川者見僕法而垂涕匍匐拜士章曰主人有子耶幸矣幸矣出馮都司牒證其墓士章哭奠哀不自勝居人皆來賀易棺而殮如初喪士章刺血濡縷沾枯猶潤手指親排踵癢如撫摩之者累夕而神尚驚動骨肉相逢固有若此之異者哉當啟行世勲殊不忍別挂紙馬首送一舍泣拜而返以是

月十六日臨山海關士章持父故繻向關而焚大呼曰父歸乎入關矣其焰隨颺馳入關若有神焉越十月中旬抵家若岸集諸友生而為之奠其文述公所邁之奇甚備士章告予曰天不泯滅余宗令得歸父骨于故土藉諸君之庇復修先隴而合葬焉孤之葬大母及吾母也幼不知殯大父處今得合大母以祔而吾父亦得合吾母以祔大父諱一鴻字政夫為郡庠生弘治辛酉年五月二十四日辰時歿萬曆丙

成年十一月十八日辰時主所志也大母生不計年
卒不計日可痛已而父之歿于遼陽依稀記其年不
能悉月日也母王氏余岸人生嘉靖辛丑年正月初
二日卒于三月之二十三日悲哉茲擇于十一月二
十五日丑時合葬一塚在巖鎮竹林巷薛家坦而先
生為我銘焉題墓則乞諸方少司徒公士章字伯達
里人稱之孝子有孫德賓年甫九歲馮都司失其名
地當有國士知之劉公諱曰梧南昌人以太常卿攝

應天府尹方任君諱以巽若岸則其仲子士達也亦
稱豐公銘曰謂爾貨殖也而游辟雍謂爾壯夫也而
為鬼雄托交而邱爾死者都閭馮執役而守爾塚者
高世勲聚族而歸爾骨者方豐公愍孝而表爾墓者
九四翁報主而識塚者僕法逾耄遠相從合葬二世
竹林中遼陽之鶴棲長松室有子兮樹為龍宜爾子
孫兮享純孝之報于無窮

紀余元昭公重建新橋事

王泰徵

鳳山之岑自余梅莊公造虹梁于嘉靖之乙未郡西
利涉不賦匏葉者至今百四十年方其閱七十載時
衝濤啣趾基且泐公之孫念橋公又葺而新之是在
萬曆甲寅矣先時題橋者有少宗伯涇野呂公作記
則大學士石麓李公故公之懿美著于當世念橋公
既修前烈弱候焦先生以為勝事不可無名文續之
乃作碑誌以傳余元昭公之大創飛甍流壩重壯也
雖云踵事何異荒高也乎王子循堤沿瞻禮鴻麗穎

頤沉沉何余氏之多賢如此哉屬閒無事類鄉邑有
起委蕭長人倫事闕風教者嘗鉛槧油素陶猶而歌
詠之以示來茲有斯芳蹟而載筆不廢士大夫之過
也因得私錄識勒于簡按公中人產耳雖治牢盆賦
賈在中中方之氣類不為上家也里人謂公貲誣于
梅莊公三之一而事難于梅莊公十之九何難乎爾
梅莊公當時里居萬竈屢肆珠聯素封陶白家或以
巨萬緡佐國家之急至或雁塢神臯琳宮梵宇懼不

得法施而丐朝旨以造焉即不肖先王大父賈于邛亦屬獨建學宮為蜀士所俎豆載在汪司馬集何者國家涵泳近二百年文景之後宇內承平戶口殷實即一時巖中又有孫公下渡一人獨創役夫四萬有奇亦四十年內事而人不以為奇也今邑里蕭條鴻雁無歌登登馮馮之聲四三十年不聞築削而公以布衣崛起司鹿上之盟則破例難嘉隆間父老傳米薪價值如土僦役踐更泉刀視口食而賦無多贏故

孫公夫動至數萬當時行值僅踰千金今之受功率二十鍾而擬一石即數算矣則徵繇難梅莊公時義楔頻旌國爵有拜爾時縉紳喜語仁義如唐心菴鄭時夫先輩皆慇懃樂善而四方翕然誦之以故人習為好吏亦不苛頃來大戶容頭過身不異瑣尾之子矣何物窳些丈夫而敢代國僑以洧濟煩貫珠之巧言是無故而犯之尤也秦鍼之選墨者之奇貨也則畏罪難元昭冒此諸難不議于親不諮于友而獨斷

以成此盈也豈非人傑也哉而余更奇者聞公之將興是役也語仲氏曰吾通閱故園溪梁告殞吾不辭虫臂以隧隆車若不與弟析箸者溪流或迅石捷菑而魚沸鬱也恐并弟而為薪續矣若何仲氏曰兄何少弟之甚也夫市利者在眉睫市奇者在數十年市義者千百年而未有極也兄公其小而私其大可乎公曰能如是子主是役矣先是梅莊公首舉是議獨謀于孺人孺人曰見美無讓公速承之公之弟梅莊

公之妻以是知天將大啟于斯人也功不獨建必有為之比焉耦而同心矣逮仲至而相其流澌按其滌蓄於是設廬于北以居工置長廡于河干以居絙釜鐵藁秸木石之備石工云此役殆事倍于始事也蓋一毀一成碣石砥柱之功如拔趙幟而後立漢幟也如陽慶舊方必先去其故技而後新可授也故觀者謂公重造焉經始之日架梁負棟冠石磨崖畚築于激射之旁根注乎沸騰之下人天側塞皆拭目睇世

間大力男子之所為公兄弟不震不懣慘澹經營以
尺度曰修凡四柯者四也以廣計曰容乘車之三個
也選石而得理之堅鍛金必取楚之利其礮以砂束
之小要務使當車結軌日甌割焉其砥可以不泐遙
而眡之如水在地如繫在懸如一泓聖琉璃嘆其修
修寬路何肉稱而平沈也公可謂良工心苦哉越明
年周有欄豎有幢梁盡而大建亭以落之收林臯之
全勝慶行旅之逍遙率坡轟空潺湲激砌是前者梅

莊公所未有也一時義公事者邑大夫束帛三旌寫
其式燕巷居人釀金作會寄其緇衣而公之宗父老
亦復率其本支羊酒壽公曰先靈福子鄉三老纁幣
承筐肅拜而三祝曰吾巖在頃類隧風之孔優矣公
能輓頽流而上征吾鄉猶未艾哉而彼都人士各以
其愛敬之公傳于謠頌其旅進陳言則有不腆羔雁
徼福于先宮端先亞中之降鑒以大錫祉我元公而
因以敷我鄉人以為公壽公拜稽不肖涼德何任大

旌亦唯是梅莊公距躍成勞不敢離邊代先君子竈
上騷除耳諸長者括羽而鏃礪之其敢不愍置諸耳
是役也唯王子半菴以跼蹕不與斯會竊謂修輿梁
以濟涉百世之利也而壽斯梁以永貞使異時海枯
陵變人不及見茲橋之盛而猶得指長虹之臥波則
非文何以傳之謹具其事如左以附于念橋公焦氏
碑文之後俾後世得觀矚焉

重修通濟橋記

綺園吳 崧

按嘉靖郡志紀關梁載歛之橋十有三而巖鎮之通
濟與焉通濟易木甃石始于明成化十年太守周君
命耆民汪用本等募而成之歛廣文袁君誠為之記
詳諸郡志可考也鎮為六邑都會車馬往來之所輻
輳東達金陵武林西出楚豫閩粵咸必經此然山川
發源分而為二其自金竺來者扶輿盤礴孕秀于蔭
山而下為上街其自天馬來者支分派別作鎮于南
山嶽山震艮山鳳山為下街而其中潁水限之是橋

之興所為利涉者廣也歲久傾圮不良于行汪氏之族孫鄉飲賓曰仲光者思欲踵前人意募以治之而志未果其子州同知宏佐明經宏任奉母程孺人之命曰橋所以通濟者也前人募之後人踵之宜也然一日不治則輪蹄咨于道與其待之經年使行者苦焉何若費于一家而逮通濟之為便乎二子遵之伐石取材不數月而成訖工于康熙四十七年十一月望日乞余為之記余惟是役也秉母教以興善至孝

也出家貲以利濟至惠也遠承祖德至仁也不沒鄉人募造之名至公也有此四善橋可以永昔蔡端明繕泉之萬安橋亘三千六百尺糜金錢一千四百萬其為文祇百五十一言周櫟園稱其簡而碑版流傳海外無他事無溢美亦不費其詞也余故書其時日勒于橋左

程君重建孫公橋記

余華瑞

凡利未與人無望其便于已也迨享其利久矣忽從

而奪之則人之不便也滋甚鎮北豐溪之三渡成化而上編筏以濟縱濡首滅頂視以為常弘治丙辰義士孫公憫厲揭之艱于下渡伐石為堦架木為梁墁之以石覆之以屋民不病涉已二百年康熙丙子大水衝擊屋傾石圯歲癸巳遺火焚燬梁木中斷孫氏之賢者傾資補葺為里約聯之可通徒步至戊戌怒濤湊潰堦石悉傾兩涯懸絕望洋興嘆無津可問人涉印否號呼誰濟哉昔鄉先輩其賢程先生尊德樂

義時懷吉凶同患之思恒言曰利人之事苟吾力之所及是宜當仁不讓也華瑞以姻家子與諸郎君習聞斯語而里黨間亦嘖嘖誦言不衰先生久歸道山長君倬亦修文地下行役之人莫不感念今日而有程先生其人者乎不患斯橋之不復矣里之紳士耆舊登先生之堂述先生之言以告先生之哲嗣仲君佶季君僚文孫子瑜不謀而合僉曰是先君子之志也竊懼析薪而弗克負荷以貽長者羞奈何於是度

材審勢謂孫公之籌畫咸宜經營詳密惠澤至矣第
當日橋根石骨不無罅隙可乘喬木雖堅韌今水腐
火焚無餘燼矣不若庚以石之可久也仲君屏絕百
務專志輿梁質明而起率先匠石之勤烈日嚴風未
嘗少避爰撤其舊而窮極其基兩岸石骨皆坡陀趨
下中洞深沉入水文餘而後得凡植基處攻之使平
砥之如砥然後層累而上始固而不顛仍分門九而
崇厥楣選石之良以甃其面勻停密緻如琉璃一泓

兩旁疊石為欄端凝雅稱履道安詳南首拾級而登
樹之以亭行旅得休息且庇風雨亭上有樓可以揖
浮邱招容成而攬六六芙蓉之秀也南之東存勸讓
亭之故迹而弘拓之西則水榭數楹為亭之輔翼其
制莫不盡善已工始于雍正元年癸卯至九年辛亥
告成石以數計者貳萬 千匠以工計者肆萬 千
陶冶木植不與焉當其既廢而復興如人失所恃而
獲者大過所望也口碑之載何遠弗屆歟孫公值百

昌聚順之時物力省而為功易用錢肆千緡而已足程君則什物騰貴于疇昔施功又倍于古人貲費且萬金絜諸孫公幾於三倍矣而不尸其德仍紀曰孫公橋是豈好名之人所能為哉克成先志孝也同心協力友也不泯前人之善大而公也又豈徒好義之士所能及哉華聞孫公之始基也有三異人助以揭沙壅水之術茲自北而南第五堞為力最艱將出水而需鉅石以奠之適日暮力不能及翼晨羣工擬協

力舉之見此石已端然鎮于其上無煩人事神之祐善古今寧異轍哉

余媛完璧傳

汪濟淳

余媛邑巖鎮人隨父僑居廣陵許字澄塘吳生本尼為繼室乙酉廣陵城破玉石煨燼余媛年十三為某將軍所獲見其髮才覆額嬌倩絕倫嘆曰此真國色惜瓜期未逮予姑待之終當以是子為溫柔鄉矣命老家入控一騎至曰汝載此女歸謁太夫人余媛涕

泗橫流不敢仰視心念所稱太夫人必將軍母也躊躇陰自為計頃刻至營老家人引媛詣太夫人前致將軍命媛端肅再拜太夫人止之媛曰兒失恃今得見慈顏是天錫兒以母也母肯寵施大惠以女畜兒兒當長侍膝下言已復拜太夫人見其容止詳慎言詞可矜知為良家女大憐愛之慰媛曰爾以我為母我豈忍不以爾為女遽命侍兒傳語請某姐來見若妹至則嫣然一姬蓋太夫人幼女長媛一齡媛迎拜

以女兄禮事之媛從母北去凡兩年每將軍至輒避匿一日侍食母側將軍突如其來不及避以妹禮見將軍注視之綠雲堆首朱蓮貼地澹眉凝遠岑素臉欺艷雪將軍心動幾不自持以太夫人故強抑情夕令人召媛太夫人呵止之後復召太夫人乃庭坐呼將軍至責之曰是兒為我女于汝妹也兄妹有禮干之不祥爾雖武夫詎可自同犬豕耶將軍逡巡強應曰不敢太夫人欲為媛擇壻以絕子念媛泣告曰兒

與吳氏有定盟倘藉母力得歸吳氏則母賜也否則
寧畢命母前不敢以貳太夫人義其言益愛且敬之
謂之曰兒母憂是我責也戊子將軍以事至金陵母
挈媛偕行馳揚州命人物色本尼召之見本尼不測
其旨不敢往時有與將軍同官者心美太夫人此舉
為告江都宰宰召本尼告以太夫人之賢暨余媛貞
守苦心本尼感悟泣下介將軍同官幣見太夫人太
夫人為媛治裝卜吉歸于吳燕婉之夕居然完璧焉

再修芥菴亭樓後記

余華瑞

雍正辛亥芥菴茶亭下宇棟折樓危欲傾住僧托沿
門之鉢僅得資助拾伍緡無能措手予壻程子虞在
欣然以為已任壬子夏工甫就而亭左右溪塲傾瀉
拾餘丈僧復竭力丐募所得亦祇如前數虞在又毅
然任其成二事計用約近百緡虞在居三之二閏歲
甲寅石塲再崩虞在復輸資貳拾捌兩零獨力成之
不煩將伯助也華已樂為之紀其仲子名碩字既庭

委曲將順以奏膚公且出膏火餘錢貳萬易良田以充香積誠盛舉矣爾時工師不良于擇木遺有朽蠹蠶食一肢遷延全體歲僅載週而樓危若昔虞在目擊心傷適不幸而有仲子之戚不遑及此仲子之婦巴氏矢志靡他荼苦自守勉事舅姑歷經服闋去夏年及三旬諸媼族以為節壽祝之宜有加禮氏閉戶涕泣自傷未亾人以得速從地下為幸何生之可言也然尊者之賜父母之饋遺則不敢卻爰哀集所受

而進于庭請以供亭樓薪木之需佐吾翁之嘉績亦以慰先君子之素志也翁飲泣頷之于是鳩工庀材盡去其故方而新其樸斲堅緻詳慎莫不完固為期三越月經費近貳伯金皆節婦願力所成就也華因之有感矣在昔先秦有巴寡婦清能守其家卅穴之富以自衛其身始皇帝築懷清之臺以尊禮之清不過自擅其財而已今巴氏不靳其所有以濟人利物奚翅超越于清哉翼時烏頭雙闕表厥宅里舉其懿

行以樹風聲即茲一端流芳寧不千古歟敬紀之以
俟採風者

巖鎮文筆峯詩

桂州夏言

維歛有巖鎮山水清且雄閭閻撲地起舊俗敦儒風
呂午官學士勸講宋理宗我明唐狀元崛起正德中
此地多生賢允為靈秀鍾人言鳳山臺水口宜增崇
庶幾關門壯愈益風氣隆叅政鄭公佐高誼啟深衷
里人方德孚倡議僉謀同千金出富屋萬杵興鉅工
屹然建浮屠號曰文筆峯拔地數百仞遠近瞻從隆
玉毫倚青天砥柱溪流東落成歲戊戌甲科躍三龍

信哉堪輿言改命奪神功壬寅子南歸堂開丹桂叢
仗鉞中丞老乃是汪東翁為予談盛事索詩紀初終
聊揮舊彩毫勒辭詔無窮

是役也德孚方翁贊鄭雙溪力居多翁子上舍君
鑿力成翁志而一鄉之善士咸賴焉然非中丞汪
公樂道之惡能顯哉嘉靖癸卯夏仲特進光祿大
夫上柱國少師兼太子太師吏部尚書華蓋殿大
學士貴溪
夏言題

巖鎮八景詩序

閻禹錫

予至徽方半載屢持檄按部道經巖鎮每見山朗水

麗屋宇鱗次行積遷易誦聲洋洋徒于馬上過之初
未知有何景也公餘從事吳讓進曰僕世居巖鎮鎮
之儒先嘗名茲鎮八景迄今未經品題恐遂湮沒願
祈巨筆以張之予詢之曰厥景云何讓對曰七墩星
列雙廟曉鐘雙溪水色兩市書聲龍池秋月馬嶺朝
雲紫極丹光黃羅雪霽予耳之嘆曰寓意遠哉其曰
七墩星列昭休象也曰雙廟曉鐘示忠義也曰雙溪
水色明自取也曰兩市書聲抑末務也曰龍池秋月

澄人心也曰馬嶺朝雲窺大化也曰紫極丹光固本源也曰黃羅雪霽堅晚節也其寓意遠哉予遂揮毫作近體一章以示之曰七墩星列氣何雄雙廟風清度曉鐘馬嶺朝雲迷彩照龍池秋月浸瑤空雙溪水色分涇渭兩市書聲闕徵宮尤有丹光盈紫極黃羅雪霽玉瓊瓏既而讓復持處士唐邦植所作小序并律詩徵予序予觀其鋪事典雅奇韻鏗鏘玩咏之餘几案隱隱留遺響詢之乃元賓之長子子儀先生之

姪孫也其家學可謂有自矣夫地因勢而靈人因地而傑理固然矣傳不云乎詩可以興故用引于首俾讀者有所興起異時從容撫景縱眸忘言相對收清淑之氣歸吾肺腑天順七年癸未季冬徽州府經歷前國子監監丞閻禹錫書

七墩星列

墩在鎮之東嶽道院之北平地突起七墩彷彿北辰之布列

累累土阜若星纏七點珠環斷復連混沌初開形已著春秋自換柄難旋不勞太史占分野長伴仙家度

歲年欲把支磯詢蜀客乘槎何處覓張騫唐邦植

平原凸起七墩來布列分明似斗魁樞紐已從坤位

奠璇杓不向艮宮迴靈鍾勝蹟依東嶽秀引清光接

上台幾度月明登眺處此身疑近北城隈余修

雙廟曉鐘

廟在鎮之西奉張許二忠臣每清晨鐘聲隱隱來枕上

天鍾正氣產英豪保障江淮志節高百戰精忠餐鼠

雀千年遺像享牲牢竒聞已見收神怪逸響還能警

俊髦最是霜清殘月曉儼然憤氣激秋濤唐邦植

協忠雙廟曙光分隱隱疎鐘枕上聞百八鯨音歎落

月萬千厲氣激秋雲征人夢覺思行役義士心驚感

報君昭代褒嘉崇祀典也勝麟閣著功勳余修

雙溪水色

北溪濫觴遠其流清南溪浚源近其流黃至鎮之中會合東注每當雨霽清黃相半界破中流

渺渺雙溪合一流出身原自不相侔誰將濁水淆清

水為是南流接北流虹影中分如彩間日光西下似

金浮濯纓濯足由人意孺子何勞苦唱謳唐邦植

雨源相滙共朝宗涇渭滔滔色不同南似黃河翻濁浪北如濟水浸長空釣魚磯畔汀蒲綠沽酒橋邊岸蓼紅塵足塵纓皆可濯扣舷歌罷趣無窮

余修

兩市書聲

鎮五里許中橫石橋平分東西每深夜讀書聲徹于東西兩市

市井迢迢驛傳通中橫一水隔西東新秋燈火親黃卷午夜弦歌送晚鐘杳靄常隨溪上月依微每逐竹

邊風聖賢事業薰陶熟際會明良治化隆

唐邦植

比屋人煙數里居化行俗美事詩書傍溪竹戶親燈

火隔岸芸窓避蠹魚風送吾伊喧兩市月明弦誦惜三餘紫陽千古儒風盛賢聖嘉謨更起予

余修

龍池秋月

池在鎮之西北世傳因離山高聳故鑿九池于坎地以厭之旱禱輒應每

秋宵月浸如龍戲珠

耿耿方池淨若藍昔人開浸鎮南山光含鸞鏡鯨波

靜影浸驪珠兔魄寒霹靂震時疑起舞蟾蜍浴處暫

盤桓祇令四海皆霖雨何用于斯久鬱蟠

唐邦植

九區方沼淨如羅月色含秋景最多河漢疑從波底

轉魚龍儼向鏡中過
桂花香襲鮫人窟
兔兔光搖太液波
幾度賞心清不寐
開樽對此重吟哦
余修

馬嶺朝雲

嶺在鎮之東南巍然而峙象若天馬每清晨之際雲氣勃勃杳靄迷遲

此嶺何時擅美名
房星下降為生成
風搖草木疑鬃

拂雲擁岡巒似氣
生幾度從龍思變
化多年伏櫪不

哀鳴屢聞明詔却
千里好伴幽人遂
遠情唐邦植

山形如馬自天成
清曉葱葱瑞靄臨
天外昂藏疑出

廐日邊駿鬣每成
陰不勞伯樂垂青
眼曾感梁公動

孝心莫向山頭久
舒卷好從龍去作
甘霖余修

紫極丹光

紫極宮在鎮之南宋章仙官焚煉之所至今遺迹猶存每深夜月明山氣鬱葱如丹光之色

仙家結構傍南山
煮石然薪煉大丹
紫氣上騰魑魅

泣紅光高射斗牛
寒芙蓉火裏存金
性楮拙爐中煨

玉丸流水硃砂人
共飲老當益壯駐
酖顏唐邦植

琳宮有客得玄方
鍊就還丹去渺茫
竈冷千年無宿

火鑪存午夜有餘
光一痕直貫南山
頂萬丈遙連北

斗旁自是仙家多異術故留遺蹟在吾鄉 余修

黃羅雪霽 黃羅山在鎮之西南高揮雲表隆冬雪霽恍如瑤瑤

利奇疊巧號黃羅每至窮陰積雪多旭日射時銀出

火斜暉映處玉重磨初疑天漢翔蒼鳳還似江湖湧

素鷺幾度凭闌遙顧盼花搖雙目費摩挲 唐邦植

萬仞黃羅雪昨晴彤雲開霽日華明璫瓏巖壑瓊鋪

遍峭拔峯巒玉琢成田野年豐先有兆石泉凍合靜

無聲凭闌極目詩肩聳人與梅花一樣清 余修

右從百忍程氏家譜中錄出存之以留故蹟

續增巖鎮十二景詩

鄭佐

雙溪水色 兩市書聲 鳳臺積翠 雁塔撐霄

龍池雷雨 烏石煙霞 三榭清風 六橋明月

七墩星列 五嶺虹連 紫極雲開 黃羅雪霽

老于十二景中樓臺增新成日可躋烏石煙霞光兩

市龍池雷雨動雙溪七墩星列黃羅北五嶺虹連紫

極西明月橋邊風榭下行歌坐嘯任天倪

附巖鎮十二景絕句 有小序

余華瑞

雙溪水色 源分流合涇渭不濁

世情難強同雖合猶形迹我未盡靈犀胡然分紺碧

兩市書聲 古之盛時貧不廢學

比屋耽高吟雅韻從天降更有金石聲鏗然出陋巷

鳳臺積翠 曲檻停勻高出松表

松頂如平疇春風新雨過落日照炊煙青雲飄入座

雁塔撐霄 挺然特立收豐水之波

豐水已東注迴瀾尊砥柱孤秀偪蒼昊靈光萬物覩

龍池雷雨 舊有業醫于此者其技甚神

有龍池則靈龍癡雷不鼓昔有千金方今已化烟雨

烏石煙霞 諸石多赭此獨黝然為近

太古墮星精神光斂如漆靜極靈竒生迷離盪朝日

三榭清風 靜可息陰高可眺

盛暑登高臺微涼生屋角煮茗讀南華煩心時浣濯

六橋明月 隨波曲折各駕長虹載

縱橫卧溪澗清虛吐圓影瑣碎激灘聲坐覺秋光冷

七墩星列于平原之中突兀而起天然秩次自成斗柄魁杓之狀

不欲作平蕪點綴生微阜地脉接天文形連杓與斗

五嶺虹連潛虬屈護隱隱隆隆而極蜿蜒盤旋之象

夜半聽龍吟若斷復若續宛轉作藩籬雲烟生屈曲

紫極雲開南山舊為文會先輩之所發祥今易其地而弗良識者不勝其惋惜

帝座呼吸通南溟六月息鍛羽墮青冥空言目五色

黃羅雪霽峯踞丁方為鎮之文筆凡居南向者羣挹其秀

玉山雖白醉卓立照天闕持書倚南樓光燭寒宵月

喜松兄入社有序 潘 句

巖鎮之北逍遙隄上有松林焉栽培在隆萬間夫

已氏先塋之蔭木也當神宗丙申丁酉歲林始茂

余家羣從兄弟方總角讀書溪之南北兩涯午餘

倦後散步林中一株挺然形如舞鳳枝若飛虬才

拱把耳咸共賞之目為碧雞青鳥計其年少長于

余今喬木矣歷光熹二宗林木益茂每經其下徘徊

徊不欲去呼為兄而揖之不啻米顛之拜石丈也
逮成宗之世兵饑日煩民生日感人家封樹戕賊
殆盡匪但民間即孝陵亦有不免朝議修祖陵而陵木伐矣嗟
乎危哉松兄安得無恙夫已氏業并其族類而鬻
之薪者一旦斧斤將有事于斯焉從兄爾尚聞而
告諸社共贖之松既歸社永無患矣喜而賦此里
人潘句

弱齡適深茂肩隨把臂入謾謾聆高風森森翳斜日

拱把時逸羣鱗鬣本無匹碧鷄與青鳥嘉名肇余勅
日烏月兔旋遷燥還違濕百年一刹那轉矚成萃嶺
兄乃岳然高我胡啜其泣謂樹猶如此人何以堪立
秉志餐菊英無貴染柳汁憶當總角時林卧誦詩什
今看皤然翁策杖每將即喬木榮故園故人憐古質
永謝賈薪者長與去聲南山集里中文社十倍石丈崇
不止一顛揖

謝烈婦斷石吟

王寅

烈婦邑人謝縉妻蔣氏也為夫烈死絕粒一旬縊
刃兩救竟以首墜樓而石斷以死其烈甚矣邑人
能言者有銘有傳予以斷石而死古今稀聞乃為
賦斷石吟亦為石幸也

相如抱趙璧西入秦廷內睨柱髮衝冠首願璧俱碎
虎狼之秦心亦寒歸璧尊趙首可完烈婦夫死無術
起首與石俱碎斯已趙家傾國讓相如烈士烈婦良
可比石今為重璧為輕論價休言十五城常時定有

靈光吐不知星化落何處石兮石兮宜題烈婦墓風
雨春林山鬼護

客園雜詠 并序

谷音潘一駒

性喜園居天奪清福每乘閒遨遊何殊逆旅命之曰
客園名從字也感而為雜詠義亦於焉况乎百歲光
陰疇非過客江山風月本無常主會心處一坵一壑
一樹一石種種皆吾園中景物則種種皆當收入古
破錦囊矣是以留連玩賞獨寐寤言既形詩歌復事

圖繪非曰誇我園林聊以適其野性云爾

末霞嶺

朝霞與暮霞杳渺天之末坐久霞沾衣歸來紅未歇

修竹園

東谷清人樹西陂芙蓉花此中乃渭川抽空綠影賒

谷音軒

生芻秣空谷遐心不可留獨有好賢人猶以音聲求

蒹葭館

伊人水一方望望不可即至今頌其詩遐想蒼蒼色

虬石潭

蒼然飲潭上紫玉出潭底夜深潭邊坐受此月露洗

磊軒

胷中故不平軒內亦磊砢借問軒主人須用酒澆否

貢元坊題名

洪武年分

王彥榮

府學判官

薊州

方仁顯

府學州同知

荆門

王斌

府學

永樂年分

唐懋

府學

宣德年分

余士美

府學鹽運司

河東副使

余

芳

府學縣主簿

禹城

正統年分

閻道政

府學 漳浦
縣主簿

吳慶

縣學 威遠
縣知縣

天順年分

郝亨

府學 宜春
縣主簿

成化年分

方常

府學 安仁
縣教諭

汪仁

府學 遂平
訓導

正德年分

吳騰

府學 平湖
縣訓導

邱嵩

府學 衡府
教授

嘉靖年分

方元禎

府學 齊東
縣知縣

孫珩

吳廷楷

縣學 鉛山
府學 訓導

吳理

府學 修武
縣知縣 舉人

洪希明

府學 學正
縣學

方頤靜

縣學 教諭
鄭玄撫 縣學

隆慶年分

余鋁

府學 武學
教授 恩貢

方洪

縣學
教諭

閔世美

汪其燦

縣學

訓導

曹心

府學判

江東

鄭崇儒

府學

教諭

程湛

余震啟

府學

教諭

萬曆年分

閔尚綱

方道通

縣學

進士

曹懋

府學縣主簿

潛江

閔濟美

汪國偉

府學縣教諭

盱眙

天啟年分

余袞

崇禎年分

汪明傑

府學

潘一駒

府通判

雲南

程世滋

余有灝

恩貢

副榜

王宸

王仕雲

進士

方邦台

汪啟棟

曹序

石門學

順治年分

曹以邁 縣學 恩貢

吳鍾斗

汪蕙 縣學 選貢 兵部職方司主事

吳奮庸 順天學 拔貢教習 歷任至嘉興府同知

吳士升 吳爾升

趙之昂 方式玉 縣學 崑山 縣訓導

閔燮

康熙年分

閔遵古 府學 潘輔

鮑夔 浙籍 進士 鮑蘅

閔本貞 知府 部郎 王文開 府學

程名達 王綸 部 陞行人 知縣

吳龍光 方祖巖

吳秋士 余華瑞 府學

程佶 江都學 內 江殿柱 錢塘學

余山 江都學 淮安府 教授海鹽縣知縣 張士坤 縣學

余璉 阮讚 宣城學 章丘 縣知縣

阮維崇 宣城 羅炳 無錫學

閔宏聲

方祖惠

府學正貢

程倬

府學

程子琳

杭州府學

汪宏任

閔本元

曹肩吾

石門府學訓導 杭州

曹揆文

拔貢

曹坤柄

石門康縣學訓導 武

曹廷孚

石門學

曹蓼莪

石門學教諭 丹陽縣知縣 孝豐縣

曹仔任

石門學

曹學曾

曹承曾

汪芹

縣學正貢

汪熙楨

府學正貢

方職

府學

程子瑜

府學

方鴻

副榜

程志淳

府學 安東 縣學教諭

方為源

江都學

程子瑤

錢塘學

雍正年分

程子瑗

洪鍾駟

舉人

咸淳丁卯科

汪璵

解人坊禾載

正統丁卯科

吳真

天順壬午科 方佐

成化辛卯科 汪中

成化癸卯科 汪淵 汪侃

成化丙午科 阮玘 吳遠

弘治壬子科 孫忠顯

弘治辛酉科 王寵

正德庚午科 英文獻 方遠宜

正德癸酉科 唐臯五魁 鄭佐 趙時勉

正德己卯科 潘英

嘉靖壬午科 孫忠弼

嘉靖乙酉科 王獻芝

嘉靖戊子科 胡川楫 汪佐

嘉靖辛卯科 王獻麟

嘉靖甲午科 鮑道明經魁 汪伊

嘉靖癸卯科 吳德元

嘉靖丙午科 方弘靜亞魁

嘉靖己酉科 王尚禮

嘉靖壬子科 吳世忠 汪世光

嘉靖辛酉科 潘侃 方鉉

萬曆壬午科 方元彥

萬曆戊子科 潘之惺

萬曆甲午科 程雲鵬

萬曆庚子科 方道通 吳時泰

萬曆癸卯科 方可觀

萬曆丙午科 鮑觀光

萬曆壬子科 汪東旦

萬曆乙卯科 方士亮

天啟甲子科 程紹儒

天啟丁卯科 鄭應桂

崇禎庚午科 程名世

崇禎癸酉科 汪有道 曹應鶴

崇禎己卯科 阮士鵬 曹廣

順治乙酉科 潘士璜

順治戊子科 王仕雲 閔叙 經魁

順治辛卯科 鄭嗣武 吳雯清 原名玄石 避御諱更名

順治庚子科 阮葵 鄭吉士 方秉禎

康熙癸卯科 吳觀垣 經元

康熙丙午科 吳苑 經元 王鉉

康熙乙卯科 阮爾詢

康熙丁巳科 鮑夔

康熙辛酉科 汪薇 經元

康熙庚午科 鮑開

康熙己卯科 吳瞻淇

康熙壬午科 曹志宏

康熙乙酉科 吳崧 阮體元

康熙戊子科 李紱 解元 方覲 汪誠

康熙辛卯科 方士模 李孝源

康熙癸巳科 程御龍 李紱

康熙丁酉科 曹載寧

雍正癸卯科 程錦 王瀛洲 方騫

雍正甲辰科 李繪

雍正己酉科 汪起謚 吳金翼

雍正壬子科 汪為楫

雍正乙卯科 張鑾

進士

天順丁丑科 吳真

成化丁未科 汪侃

弘治庚戌科 汪淵

弘治癸丑科 孫忠顯

弘治丙辰科 吳遠

正德戊辰科 王寵

正德甲戌科 唐臯狀元 鄭佐

嘉靖癸未科 方遠宜

嘉靖壬辰科 王獻芝

嘉靖戊戌科 汪伊 鮑道明

胡川楫

嘉靖庚戌科 方弘靜

萬曆丙戌科 方元彥

萬曆甲辰科 方道通

萬曆辛未科 方士亮

崇禎庚辰科 曹廣

順治己丑科 潘士璜

順治壬辰科 吳燮清 王仕雲

順治乙未科 鄭嗣武 閔叙

順治辛丑科 方秉楨

康熙壬戌科 吳苑 翰林 阮爾詢 會魁翰林 王鉉

康熙乙丑科 汪薇 翰林

康熙庚辰科 鮑夔

康熙癸未科 吳瞻淇 翰林

康熙己丑科 李 紱 翰林方 觀 翰林汪 誠

康熙壬辰科 鮑 開 翰林

康熙癸巳科 曹志宏

雍正甲辰科 李 紘

乾隆丙辰科 方 騫

彙編

薦辟

方元善字良佐泰定間舉賢良方正授杭州路教諭

秩滿乞歸授本州教諭

呂旭字德昭洪武四年舉明經本府訓導遷延長教

諭

王景先洪武三十年舉人材授行人使北平再使廣

東一如巡按用事人畏服之

唐子彰薦善楷書文淵閣纂修永樂大典以母老辭歸所著有拙菴集

唐子儀洪武三十五年薦興國知縣

仕宦

余誨 南京左衛經歷

汪曜 齊和縣主簿

孫忠濟 隨州吏目

孫澤 江山縣主簿

余守約 鴻臚寺序班

孫整 修武縣丞

阮祐 滄州判

汪尚庸 樂清縣丞

汪尚齊 都司都事

謝昱 高安縣丞

吳文達 按察司照磨

方奎 順寧府通判

鮑道達 太和縣丞

汪道全 保安府經歷

孫鏞 德州判

汪尚度 徽州吏目

汪尚磨 開縣主簿

謝昭 德清縣丞

程玘 周王府典膳

程大約 鴻臚寺序班

潘緯 內閣中書

潘允升 武英殿中書欽差

汪承默 周王府長史

程汲 北直巡守驛傳

吳弘士 靖州禹州吏目

程子璋 開建縣知縣
內陞主事

程子琨 岳州府通判
候補同知

余俊迪 內閣中書

封典

孫仕寬 子忠顯貴覃恩封承德郎大理寺寺正

吳靜齡 子遠貴覃恩贈承德郎順天府通判

唐德盛 子臯貴覃恩贈儒林郎翰林院修撰

鮑榮芳 子道明貴覃恩封徵仕郎兵科給事中

王瑗 子寵貴覃恩封承德郎工部都水司主事

鄭廣祐 子佐貴覃恩封承德郎禮部祠祭司主事

方壽饒 子遠宜貴覃恩贈奉政大夫按察司僉事

王寵 刑部員外郎子獻芝貴覃恩贈文林郎南京
山西道監察御史

汪廷器 子伊貴覃恩贈奉直大夫戶部員外郎

方泰孫 孫弘靜貴覃恩贈通議大夫戶部侍郎

方席 子弘靜貴覃恩贈通議大夫戶部侍郎

方三應 子銖貴覃恩贈文林郎宜黃縣知縣

余文義 子誨貴覃恩贈徵仕郎京衛經歷

方良儒 子元彥貴覃恩封文林郎雲南道監察御史

方承恩 子道通貴覃恩封湖廣武昌府江夏縣知縣
贈奉直大夫兵部車駕司員外郎

方以蒙 子士亮貴覃恩贈徵仕郎兵科給事中

曹以成 邑庠生子廣貴覃恩贈文林郎福建漳州府
推官

潘高年 子允升貴覃恩贈文林郎武英殿中書舍人

方明性 京府經歷子邦燁貴覃恩封徵仕郎光祿寺
大官署署丞

吳之德 子雯清貴 覃恩贈文林郎廣西潯州府推
官

王承芳 子仕雲貴 覃恩贈文林郎福建泉州府推
官

閔鼎 子叙貴 誥封奉政大夫廣西按察司提學

吳一初 太學生孫苑貴 誥贈中大夫國子監祭酒
加二級

吳曠 邑庠生子苑貴 誥贈中大夫國子監祭酒
加二級

汪一麟 子薇貴 覃恩贈奉政大夫福建提學道按
察使司僉事

程維敬 子其賢貴 勅贈儒林郎州同知

程其學 子沛貴 勅贈修職郎縣丞

程其賢 州同知子倬貴 勅贈承德郎候選通判

鮑元穎 子夔貴 勅贈徵仕郎內閣中書

曹以植 太學生孫志宏貴 勅贈徵仕郎內閣撰文

曹庭 邑庠生子志宏貴 勅贈徵仕郎內閣撰文

曹孝光 子定遠貴 勅封儒林郎州同知

程沛 縣丞子子璋貴 勅贈儒林郎州同知子子

程倬 歲貢生子子瑜貴 誥贈奉政大夫候補郎

程信 歲貢生中書科中書子子球貴 勅封儒林

程僚 府通判子子瑗貴 誥封奉政大夫候選知

余應瑞 州同知子士遠貴 勅贈儒林郎州同知

程子瑾 州同知子名文貴 勅封儒林郎州同知

余廷基 孫勅貴 勅贈儒林郎州同知

余應策 子勅貴 勅贈儒林郎州同知

任子

呂士永 父文仲廢 方以巽 方以晉 俱父弘靜

武舉

王世守 隆慶丁卯科 汪弘英 天啟辛酉鳳陽 余元韻 天啟丁卯河南

王慶雲 順治戊子科 吳謙 康熙癸卯青州 曹志寧 康熙戊午科

洪堯昭 康熙辛酉科

方承烈 康熙辛酉科

方鶴鳴 康熙甲子科

潘鈐 康熙甲子河南

吳廷城 康熙庚午科

吳正遂 康熙甲午科

武進士

閔長寧 康熙壬戌科揚州籍

曹志寧 康熙戊辰甲戌兩科中式

坊表

五馬第 橋梓聯芳 鎮西 弘治庚戌汪淵

地官坊 一管 南京戶部主事汪淵

賢良 節孝 一管 西面本里諸賢題名 東面本里節孝題名

祖孫進士 方祠 嘉靖庚戌科方弘靜 門內 萬曆辛未科方士亮

進士坊 雙烈 成化丁未科汪侃 廟西 今存坊脚

侍御坊 上新 萬曆丙戌科方元彥 街口

牙史 稅務 嘉靖癸未科方遠宜 巷口

父子進士 稅務 正德戊辰科王寵 巷內 嘉靖壬辰科王獻芝

毓秀 蓮堂 弘治癸丑科孫忠顯 上首

尚義坊 槐坊 義士阮輝阮傑 巷西

繡衣里 文武開科 竹林 天順丁丑科吳真 巷東

節孝 心菴 旌表方清妻汪氏

狀元第 唐家 正德甲戌科唐臯

高義坊 輸家佐國 唐家 奉詔義官吳文光

龍章褒節 唐家 旌表方鉞妻汪氏

百歲坊 期頤偕老 唐家 潘韶同妻吳氏

殿陞執法 畿省澄清 青雲 京畿道監察御史

文武聯芳 青雲 禮部司務方佐

京兆大夫 良二千石 青雲 弘治丙辰科吳遠

尚書 祠門 戶部尚書鮑道明

貢元 尚書 本里明經題名

闡揚貞義 簡召循良 鳳山 贈文林郎方三應

科第坊 水口 本里科甲題名

仁壽坊 百齡義淑 水口 鄭鐸妻吳氏

鳳池錫命 鸞省承恩 水口 贈文林郎潘高年

應奎 鳳山 成化丙午科阮玘

癸丑進士孫忠顯 水口

巷道

後路巷

雙烈廟之左通後路直出上渡橋

丁家巷

在街南通潁溪梁邊園今在人

居屋

上新街

侍御方公元彥所開通上渡橋

四義井巷

內有四義井社

社前

先生巷

以鄭雙谿先生所居得名

鎮中街

市心橋之東北通洪橋

稅務巷

宋元時有稅務井今仍存稅務井

樟塘巷

原名余家巷有

稱楊家巷

蓮堂巷

在蓮堂西

柳塘巷

今稱殺羊巷

岳村巷

忠岳

武過兵在此地作竈故名今在居人屋內

鐵匠巷

南通花園村五二田等處昔有鉄冶故名

布袋巷

從前不通後路口題文武聯芳

堆紗巷

昔有堆紗人物

者居此舊為方氏葡萄架下

廟巷

東嶽廟對面

下新街

程鴻臚大

自程家坦通至馬下嶺孝思巷

郝家巷

一名塢頭巷又呼上巷

下巷

俗名玄壇

大塘頭

昔未有居人之時此地原為一大塘

狹巷

對大塘頭又

井巷

今名水巷

槐坊巷

今稱阮家巷

龔家巷

洪家

張家巷

竹林巷

湯瓶巷

逸事

徽素不產銀官賦米絹外純用會子戶部忽得嘉熙元年分茶租折帛錢改作銀會中半呂午為監察御史奏免銀三萬三千二百兩有奇仍用舊會又乞免本州和糴及語郡守申省將巖寺鎮官廢罷以鎮務酒稅均為萬戶以便居民行鄉為鄉井無窮之惠

嘉靖府志拾遺

程萬五宋時人少遇異人欲引仙去五以母老為辭

異人曰吾試汝耳無有不忠不孝而能成仙者吾
豈遽傷子志留子養母濟世卅年當復相遇因授
以鐵筆金符降魔逐疫驅鬼役神之術淳祐中武
林大早有司帥衆請祈雨遂于靜室飛檄雨師大
降雨澤質明啟扉五已預行留詩于壁有暫借西
湖三尺水特救東吳百萬靈之句衆覘湖水涸三
尺矣一夕無恙而終計年果如異人所期云

鄭玉重修橫山路記中有云予按武穆王以紹興元

年提兵討楊么過此故老相傳軍過巖寺鎮夜宿
人門外居民無有知者黎明啟戶見爨迹宛然方
知王兵已過矣其持已律人有大過人者蓋古之
忠賢天地因之以立極人物賴之以有生者也
方問卿遠宜汪太守伊少從父兄為商請改業而為
儒問卿之兄不許疆而後可吳舉人世忠家貧父
令習推筭乃竊讀經書有志者竟能有成如此余
意問卿之兄故賈也無足怪者太守之兄健齋先

生佐也乃聽其先為賈耶然及其請改則遂已許之不待強矣

汪太守伊嘉靖丁酉冬同鮑尚書道明胡太守川楫上公車舟抵淮安夢三人聯騎遇一人長軀修髯策馬而來者問三公得非會試者乎皆曰然敢問姓名既告之于靴中出小錄閱曰鮑公有胡公有呀曰汪公無驚覺比至京邸夢如初及將揭曉得夢及榜發三人同登聯騎而出果遇策馬而來者

形與夢無異曰公皆新郎君敢請姓名告之出靴中小錄閱之曰鮑公有胡公有汪公無汪曰無乃一頁落乎枚數之果然先是里人有夢見天榜一銜三進士鮑某胡某其一人姓名模糊難辨及報錄汪獨遲二日

吾鄉士大夫素重名節仕宦無厚積在邑里中如程方伯旦鄭大參佐吳太守遠方罔卿遠宜鮑司徒道明方太守瑜此其子皆馴謹而歿後貧乏或至

易產不能為活者司徒歿未久長子從屠人賣肉
時同里有以貲納引禮衛者其子頗汰市人戲作
一聯云引禮舍人日日街頭騎駿馬尚書公子朝
朝門首剝醃猪罔卿未歿時衣履俱弊客坐大半
壞矣惟程司徒嗣功封君江方伯珍子俱善殖生
二公家頗厚非以官起也前輩楷範後生無忘哉
余又以為方伯罔卿大參太守官未甚尊俸俱未
久貧固宜也司徒八坐敷歷幾卅年僅有數椽之

屋方歿時但將五百金營幹便可得一胄子竟以
無措而止此其貧則真然而其真貧則不可曉也
市人一對當時以為笑柄而在今日則正見司徒
冰蘖之操矣

潘中翰緯少時讀書東嶽廟祈夢于忠靖英濟王夢
王云汝之功名出汝叔氏筆端五緯圖者是也未
解其旨後二十餘年萬曆甲申寓都下是歲五星
聚奎璧叔氏侃謂為文明之象為圖遺之勉其進

取題其端曰五緯圖寄中翰姪適有中翰之選功名出叔氏筆端至此乃驗似即汀州司馬也

進士洪翼聖桂林人萬曆丁酉館于巖鎮一夕夢本鎮忠靖廟英濟王語曰即科當中經元吾使殿下大力鬼王進場相助明春聯登進士子勉哉當自愛後果俱應既中經魁即以香儀祭報紀以聯云壯氣作山河英英古為烈靈爽接夢寐耿耿今若生

闔鎮奉越國公之像于茆田祖殿其來久矣元至正十二年壬辰罹紅巾賊之亂神廟俱燬自是兵燹厲疫早魃為災者逾年及重建殿宇而止方教諭元善命工人于烏聊山肖神像迎安祖殿時為至正十五年乙未九月十四日明弘治元年仲冬廿二夜有竊其像去者翌歲仲春朔始獲于高店之野蓋竊者之家災異迭見不敢匿也

吳君文淵建三元閣于鳳山時年九十四矣其從子

世功患背疽無能起者夜見三丈夫命之曰爾食
犬肉當立效夢覺以語三子僉曰湯藥不能進矧
肉味乎犬性熱恐非所宜少頃復夢神促之食者
三乃強食之遂脫然而愈

方大法死于鑿江訃至嬖姑秘之妻程氏盥而水沸
有聲訝之尋臨鏡忽見法影乃大訝曰夫死而鬼
歸乎殆有所以命我矣亟握髮走告姑而姑拭淚
有痕乃軟語曰夫定死矣吾有夫遺體詎毀傷姑

亦無傷悲也逾五月而媿女始大慟將屆夫忌拜
辭姑姑苦言止之程祥諾而退飲藥死與夫同忌
南山文會每歲例以五人司其事有餘資則五人分
領至翌歲三月初十日即將其資交出不徵利亦
不得欠缺汪文學嘉駿字叔逸循例分領五金有
子賈于外囑其以春仲寄歸不意郵人阻于道至
三月初九日信尚未至文學躊躇四顧無可如何
日將暮矣泫然自念來日廣衆之中何堪受人誚

讓遂走蔭山投澄潭而死人急救之無及矣次早信乃至傷哉然此可見前輩廉恥之重一介不容苟也後之人攫金于市猶弗惜矧已飽私囊者寧復懼誰何哉

明之中葉凡遇臺憲臨郡率于西鄉勾取門役比戶童子盡須藏匿差役保甲借端漁獵紛擾不堪巖鎮地廣人稠被害尤劇方兵憲道通思剔其弊適代巡按臨率鄉耆力陳其事得飭府嚴禁嗣後門

役祇于衙役子弟喚充毋許累及鄉民此患永息
禁碑立在水口

余贈公文義產未甚贏好善樂施義聲與富名交著夜半有暴客十餘人升其屋贈公整衣冠立中庭拱揖而告曰我余文義也勉力做人家無餘蓄薄有資斧總在汴梁諸君徒受其名無益若有所需詰旦相商豈不兩全其美羣盜唯唯而退翌日有僧道數人陸續而來以募修橋路塔廟為名各如

所請應之不貳伯金而止

康熙乙亥秋潘孝烈羅氏之卒其家窘不能喪族人為備棺衾闔鎮紳士鄉耆輸資以祭以葬傳狀銘誄詩歌盈帙大司成鱗潭吳公苑主其事舉殯之日冠蓋相望四方來觀者不啻萬人郡邑文武官師賻以禮儀旌以綽楔可謂榮矣先是其所居曰完名堂近百年來喪柩克塞兩楹之間數日前因爭營葬地盡舉一空孝烈之柩乃得殯于堂中議

葬地須在通達其族之先世有建祠遺址在鳳山之左閒曠幾二百年羣請于其後裔得以經營闢萊啟土則佳城也擬樹二豐碑水涸石不得致適潭渡潛口建造所餘各有其一合而用之恰成雙壁

亘史云萬曆丙申九月初六日巖鎮僧婦方售得汪家帳幔銀三兩一錢以紙裹之執在右手兩婦翼之而行行至蔡家橋一蒼鷹擘空下瓜微傷僧婦

臉皮及臂指血出遂攫所執三婦盡昏迷不測所以市子譁而逐之鷹啄高樹落其紙口爪銜拳而去又棲三官殿屋上移時飛入山中不見僧婦社友方羽仲家傅母也予親問之如所聞未幾而有程守訓及內相至郡中搔擾大戶礦稅之事蓋其兆也至甲辰閏九月初五日南山觀前高松忽一鷹帶絛索絳枝上飛而倒懸力盡氣絕為鷓鴣所噉先日汪雲甫謝延之見而憐之持竿扞救莫能

及余笑曰是豈有咎徵耶越一日汪仲嘉得邸報云程守訓為寺人陳增所執余戲謂攫金之鷹竟弊于鼠輩豈不異哉蓋淮揚開府李三才奏發陳增驚悸自盡守訓詔獄庾死

郝文學亭讀書山館館外有陂塘湛然沉碧暑月夜亭塘上行聞塘中有喜慰聲曰翼日鐵盔人至汝得代矣可賀也應曰然生知為鬼謹誌之次日囑奚偵塘岸慎勿使鐵冠人浴日中是無所見奚倦

欲歸畏亨姑倚徙忽見有兩手擎鐵鍋覆首障日者以熱故將浴于塘奚堅持之曰浴必不免其人

不之信奚曰汝但見我主人必知其故拉以見亨

亨告以夜所聞命奚持湯浴之其人感而去亨是

夕復塘上行聞哭聲曰事已垂就乃為郝主簿所

敗亨負時名有大志心語曰我豈至遽入雜流也

後進取不售援例為三舍生卒就主簿職

里人程富德字用禮明成化間捐長坦山地十餘畝

以為官舖為西倉郡侯周公大書義士二字旌之
舊時官舖在路口原名路口舖是時移置于此改
稱巖鎮舖西倉地在今友善會館之上明時歙縣
積貯有義倉二東倉在城西倉在巖鎮

吳方漣御史有先壟在歙西心菴山葬百餘年無達
者葬師皆曰不宜貴人然壠上多長松望之鬱狀
順治辛卯春白鳥數百忽集松上狀類鷺而小或
曰雀也松頂若積雪鄉老以為不祥童子每持竿

驅之人或仰投石擊松枝折終不去益多是秋方
漣中浙江鄉舉明年成進士於是人皆曰白鳥祥
而葬師更盛稱是隴為吉壤及方漣司李西粵白
鳥漸散去里人私相謂五嶺瘴癘地司李恐不生
還耶庚子春白鳥又大集未幾方漣以卓異取御
史魏叔子曰白鳥之兆其信耶其偶然耶然且至
再則信也此魏叔子所撰白鳥紀事也及丁巳春
忽白鳥羣集于其家之屋五日而去閱數日而京

邸之訃至矣豈前者祥而後者不祥耶何侍御之
始終于白鳥也

里人王良灝生于嘉靖乙丑年至康熙癸丑歷年一
百九歲貧而子立以刻竹造鳥籠為生百歲之外
入城輸糧日能行五六十里百三四歲時常走十
餘里買竹肩兩大竹而回其行如飛途遇一富翁
年七十餘觸之而仆羣僕環而噪王熟視曰此人
太無用手挈之起一笑而去郡候曹貳守高每道

巖鎮必召見贈以白金旌以綽楔

鄉飲者賓汪懷祖字念之崇貞癸酉年生少賈于四方老而家食子若孫或存或亡晚而中落疆健善飯至百歲精力不衰太守竇署守張皆厚禮之雍正壬子年正登百齡奉

恩詔建坊旌表是年十二月廿六日終

閔本辰字天玉其先原素封之家本辰幼即孤露以行乞為生然亦不肯托沿門之鉢或諸大家有慶

弔之事則執禮造門酬之以數分之資即致謝而退若嗔爾蹙爾亦不屑也有承祖屋一區雖困迫不忍售及族衆修祠需此屋以拓其基議價本辰分內應得百三四十金乃慨然歸之于衆竟不受值鷄衣垢面以終其身年七十七而坊族人為之立主祀于祠本辰窶人也能七十年敬守于前而一旦慷慨于後以眎世之貫腐紅朽而于祖宗族黨絲粟必校者為何如也

樟森塘宋其上世自宋南渡時來歛之上豐元至正十年諱大林者始遷巖鎮十世木為楚府引禮長女為榮陽王世子妃次女為永安王妃本授中順大夫宗人府儀賓配儀陽郡主嘉靖二十二年八月十六日勅命二道

方果齋先生倫少時經商北地收有一童年八歲養六年與盤費遣之歸其人後為火者陞至少監世廟命解御香于承天臨行奏請公事回假道報恩

主因至徽禮拜奉以蟒袍玉帶玩好更囑地方官用情而別倫因以所贈重貲建二石坊上曰巖鎮西街下曰巖鎮東街後改為貢元節孝二坊雙烈廟向為民火延燒歛西高店廟因郡守議毀淫祠拆去鎮人請以價易其屋料重建雙烈廟其鄉人不受值將廟料送鎮取用云每歲季春神會至此藉為東道主耳迄今高店廟神像出遊必解鞍列坐廟庭俟從人食畢而去

市心橋下有注名金剛窟水注其中有聲地師為某
姓扞住基名金錢下匱其家驟富數十年地師復
至日已暮矣無備也家人戲云惟猫犬飯可以待
之地師聞而深憾次日詭云富既富矣貴亦可圖
若改此水貴可立至隨將窟水開坑從溪中出其
家大敗家中無物不怪主人見一猫在身旁嘆曰
件件如此惟此猫還好猫忽人立而言曰小猫不
敢術士之能害人如此

嘗見鮑氏隆恩錄隆慶二年戊辰文會公祭鮑大司
徒三峯先生文署名百六十六人而首列為余公
誨太學生也方公弘靜次在第二十七采山先生
壯歲登科嘉靖庚戌成進士此時年已及艾不為
少矣十九年之進士不可謂非鄉紳矣官至浙撫
位非不尊矣而居其前者多生監也先輩引年尚
齒富貴不驕鄉黨之義昔人以為固然無足異今
則有一命而名諸父者有以族貴而加賓客者有

以穉子而先者舊者視違事何紕繆也特記之以為後賢居鄉黨之法

孫公橋經始沙陷水深不可為址忽有三人來丐傭作揭沙壅水逾二丈見石方可立基三人倏隱不見衆以為神助

橋西方惟望名達太醫院太醫喜自負嘉靖乙卯年倭賊五十人走歛歛久不見兵革城閉郊野人不得入則竄山谷無賴子因而行劫司捕者不知所

為達奮曰潰賊五十何能為乃自亂也急使人止竄者各復其所諭里中健士令耀兵為聲勢又為守禦備示無恐于是各村保亦稍團結自守賊即出境不敢掠

巖鎮自明嘉靖中立南山文會與斗山杲山相頡頏人文之盛南山稱甲會例凡本籍新文學入會則用綵旗鼓吹前導至南山亭祝史執香作樂迎于道左國學不與焉萬曆之季復建友善會館于株

山之東別為明經胄監會業之所每歲三月二十日祭文帝于其中即為課期而文學不與也崇貞癸酉春雷震水口浮屠是秋曹君應鶴北闈中式汪君有道南闈中式先時謠云巖鎮雷打塔南北兩雍發此其驗也鼎革之後斯會遂廢今僅存門榜而已其址久為僧家瓜場菜圃有志之士擬改建本里先賢節孝祠誠盛事也跂予望之

千一錄載宋時南山有道士云有道術里人謂之曰

明科進士可預知乎曰可乃伏地若夢者久之起曰吾至天門觀進士榜矣邑二人牛無頭鳥生翅也是科呂午程元鳳登第人至今傳之

亘史載萬曆辛亥年里中期頤燈社大年諸公國老一人方公弘靜南京戶部侍郎特進資治尹正德丁丑生年九十五歲 碩老九十以上三人俱處士桂公若蘭正德丙子生年九十六歲 汪公煌正德庚辰生年九十二歲 程公崇祐嘉靖壬

午生年九十歲 八十以上二十六人處士王公

世澤嘉靖癸未生年八十九歲以孝聞 張公珮

阮公時泰俱乙酉生年八十七歲 閔公樞

方公文孟俱丙戌生年八十六歲 程公麟祥

鄭公德盛俱丁亥生年八十五歲 余公鐔戊子

生年八十四歲 王公可仕 鄭公寵 吳公廷

倫 王公尚應俱己丑生年八十三歲 胡公卓

江公良椿 汪公景清 閔公文卿 典膳吳

公鐔俱庚寅生年八十二歲 光祿潘公周南

處士余公鎬 阮公鏗 方公自強 汪公夢麟

俱辛卯生年八十一歲 汪公國卿 鄭公德成

吳公淪 潘公桓 吳公亮俱壬辰生年八十

歲 七十以上百有十二人處士葉公宗堯 龔

公恩 余公鏗 張公鶴俱癸巳生年七十九歲

封文林郎方公承恩 處士潘公塤 吳公月

汪公環 俞公嘉詢 鄭公沛俱甲午生年七

十八歲 處士程公萬善 太醫楊公守倫 處

士潘公召南 汪公棉 方公邦靜 王公瑤

潘幕鄭公德威 處士方公仙年 吳公德威

吳公思忠 方公巖奎 鄭公國柱 汪公景梁

俱乙未生年七十七歲 壽官汪公溱 贊戎俞

公嘉詡 約正潘公珮 處士鄭公照 汪公依

吳公鍵 鄭公璜俱丙申生年七十六歲 江

公良榆 江公良侃 鮑公朴棧 程公弘文

葉公世安 余公大椿 洪公長壽 余公時顯

胡公堪 宋公橋 孫公廷瑀 董公湘 孫

公繼愚 鄭公鎬 太學潘公京南 文學方公

夢彌俱丁酉生年七十五歲 處士謝公一中

王公與欽 余公受益 汪公大卿 桂公壽

胡公亮 王公世恩 孫公廷珍 汪公尚綱

孫公繼伊 方公文穆 陳公與廉 文學汪公

珂 保御黃公球俱戊戌生年七十四歲 處士

胡公榮孫 方公遠宸 吳公育成 方公百毅

汪公世寵 方公文俊 潘公均 潘公大楫

汪公鏗 程公大萬 程公廷潤 郝公文模

少府吳公焯 儒士胡公采俱已亥生年七十

三歲 處士王公夢宸 汪公文漢 閔公應月

潘公儀南 胡公純寬 余公從范 胡公守

益 方公遠求 宋公高節 汪公時保 太學

龔公懋卿俱庚子生年七十二歲 壽官印公大

用 處士鄭公德咸 余公洽 潘公璠 宋公

天亨 王公之仁 胡公守謙 閔公思齊 汪

公時清 方公杭 潘公珠 郝公文棟 鄭公

樟 耆民潘公文學 少府方公大煥 外翰方

公士榮 文學謝公元經俱辛丑生年七十一歲

處士葉公本沾 胡公良詵 鄭公正文 俞

公嘉讓 程公楠 吳公桓 吳公杞 潘公文

琦俱壬寅生年七十歲 以上共一百四十二人

俱里居衣冠世胄子孫皆能承歡者一時之盛事也

世延編萬曆戊戌所紀里中前輩大年者 龍池胡

氏思仁公享年八十 永寧公享年八十三 永

晟公享年八十一 玄昭公享年八十五 雲公

享年八十六 長壽公享年八十一 亨公享年

八十六 昂公享年八十九 賢俊公享年八十

二 福公享年九十一 嚴松公享年八十六

嚴桂公享年八十二 乘應公享年八十六 鏜

公享年八十六 鉉公享年八十八 鏗公享年

八十一 汎公現年八十三 仲相公現年八十

一 潘氏汀州別駕侃公享年九十一 長應公

享年九十一子文耿公享年九十四 祖昭公享

年八十子富義公享年八十三孫明安公享年八

十五賢關公享年八十四曾孫良孫公享年八十

九社和公享年九十元孫齊生公享年八十八

壽官韶公享年九十八 余氏贈徵仕郎文義公
享年八十五曾祖仁師公享年八十七祖顯公享
年九十一叔祖緣公享年八十四兄文禮公享年
八十三子訓公享年八十九 成化改元壽官積
善公享年九十一子弘治改元壽官懷德公享年
八十 正德改元壽官天賜公享年八十六緣
公長子 方氏苑馬寺卿遠宜公享年八十四弟
文學遠富公享年八十七遠守公享年八十四

天相公享年九十三 同會五文學程銓公享年
九十一 余文隆公享年八十五 吳志道公享
年八十四 邱隅公享年八十三 張寶公享年
八十二 鄭氏湧公享年八十二子棟公享年八
十五 右據所紀一門之內祖孫父子兄弟世享
遐齡為鄉閭人瑞者由世風醇古仁義栽培天自
篤厚之也

樟塘巷原名余家巷舊有余氏義井萬曆丙申年故

儒侖之上妻節婦左氏修建因稱寡婦井後里人重甃去其姓氏井忽泥腐不可食復存其舊而水始清列

方湖石之北麓有孝思菴萬曆間里人程大約建將以祀其先也邑令劉與之不協竟為拆毀以其磚瓦木石移建程朱闕里其磚皆署孝思二字菴基鞠為茂草僅有孝思井其迹尚存

迂談

風俗者隨風以成俗也其流自上家庭之內父兄導之鄉國之中巨室倡之表端則景直風氣日上若頽波相逐江河日下則風披靡矣巖鎮成弘以前地廣人稀大璞未雕蘊石含淵渾然醇古自嘉靖盛時英賢鵲起闡闡蟬聯縉紳先生正已率物廉退為懷猗頓之家處善循理罔敢越畔父老之教其子弟講讓型仁敦素尚實貴者不驕富者不溢建大功而不矜

其能施大惠而不形德色是以俗尚醇美地運阜昌
雖有逸才不敢曳駕婦人女子砥厲廉恥稍涉嫌疑
之迹群疾而鄙夷之隆萬之間餘風未墜故其時家
安而富人壽而康尚能誦法先民率由舊典貧富不
至相耀而席厚履豐者咸知敬老尊賢崇尚儒術士
君子皆能自愛其鼎羞為染指之謀故品益高而望
益重不由其道雖輦千緡以求比附不可得也周環
萬戶市廛數里九達之衢百貨之藪易動豪舉而以

華靡為戒先達懸車亦唯芻巾布袍從容杖履里門
之內無煩輿馬時也雖有珠璣錦綺無所曳婁雖有
高軒駿馬無所馳驅人心安得不古純禕之惡習何
自而生哉三四十年來人情丕變萬象一新救化奢
麗百倍于前取快一時遑恤我後蓋緣一二狂狡創
為奇異而富者欲過貧者思及遂致外彊而中乾奢
侈之念一萌不得不重財而輕義不能不徇欲而忘
親是以近日所相矜詡者禮義不如文章文章不如

爵位爵位不如金錢是以井里之人蚊鑽蠅附以得
窺金穴為榮甚至士大夫亦或以苞苴之重輕為疏
戚遂受其牽制而唯諾無辭諂者日進烏能禁其不
驕哉三百年之仁里遠近所宗而今則外論殊不爾
矣即舉人子居喪一事言之秉禮之家必遵古制情
則致哀衰麻練服必盡其期雖不能皆如古人倚廬
苫凶餽粥蔬食然必無隱函從吉公然燕賀而鮮衣
以招搖過市者十餘年而近不知誰何創為滿七謝

客之說含殮甫畢朝夕饋奠尚未及謀急集縫人速
製青藍之衣若唯恐出遊之愆期者初猶市井之人
為之而今則士大夫效之矣初猶青衣素冠而今則
竟青紗笠矣當居閭之時已如此將素衣素鞞何由
庶見哉嗚呼習俗移人賢者不免下喬木而入幽谷
則士君子之責也巖鎮市擬五都巨姓大家百氏間
處非若他鄉聚族而居家法祖規猶可齊之以禮然
所最宜畫一者莫如文會疇昔之日先哲典型明禮

敦教辨別是非無縱詭隨大公至正見利思義名檢自持華童子時猶及見之今也不然賢者自好惟守口如瓶謹括囊之无咎中材之士首鼠兩端可淫可移非之無舉刺之無刺而以為賢已下此則或攫金于市見金不見人矣何以挽回流俗哉嘗見亘史所載萬曆辛亥春里門燈社會集者英自年七十以上至九十六歲紀于籍者百四十二人而庶戶編氓不與焉今試與同人屈指大年悉數之不能及四十人

此無他風氣隆則人之所受者厚風氣漓則人之所受者薄也士大夫能如嘉隆先輩正己率物廉退為懷令鄉人觀感而化則何風之千古而何俗之不善哉

同里後學程維翰容有書

黃師教子修鐫

嶺南言州

